

奇觚顧文集

吳郁生署檢

奇觚廣文集卷下

長洲葉昌熾

興自滄州知州王公蘭村墓誌

滄州知州黃縣王公以死勤事越二十有八年其第三子錫
蕃以講幄近臣出典閩學郵事狀至京師曰先公之葬也誌
石未具願爲文以追納諸幽竈昌熾備員史館於學使爲後
進不敢辭謹案公諱文田字心農別號蘭村先世自直隸遷
於黃 誥贈武略騎尉諱克順公之曾祖也 誥贈昭武都
尉諱大齡公之祖也兩世皆以習武爲諸生至公父諱鴻中
嘉慶丙子舉武科第一庚辰進士花翎侍衛 誥授昭武都
尉祖父復以公貴累 贈朝議大夫公齟齬聰穎侍衛公以

家世挽疆期公以通經致用公秉承庭誥篝燈下帷雞鳴未
息父老咨歎聲譽隆起年十九補學官弟子先後奉父母諱
至道光己酉舉順天鄉試謁選得廣西宜山縣援例升知州
分發直隸權知永年故城兩縣事永年畿輔劇邑輶傳旁午
縣所轄臨洺關孔道也南北用兵踐更過境者逖道公內治
文書外辦供帳芻茭糗糧之屬從容肆應閭井晏然若不知
有兵者其至故城也縣素瘠無城郭捻酋張悉諸宋景詩自
彰衛北竄百戰梟寇視彈丸蔑如也公知鄉團可用顧前此
與官相齟齬莫肯用命迺馳入壁拊循其豪桀而部勒其子
弟勉以忠義眾皆感泣請效死賊屢至輒卻之癸亥正月賊
麇聚南關莊列炬燭天實無備公偵其可襲夜率死士銜枚

擣其巢斬馘無算捷聞 賞戴藍翎加運同銜尋補滄州知
州故城吏士聞公之去傾巷出祖郊垌負弩者絡繹數十里
皆守望之旌旗也滄州負海巖險漢回雜處公下車之始捻
氛方惡張總愚縱橫三輔閒勢鴟張公募勇乘城檄各鄉堅
壁清野築圩自守賊窺知有備不敢犯當是時毗連諸邑若
鹽山南皮慶雲相繼淪陷而滄城巍然無恙方事之棘或諷
以寄孥者公慨然曰官者民所屬耳目也而可先去以爲民
望乎公配張恭人賢明知大義亦曰吾夫婦與城共存亡矣
嗚呼軍興以來守土之吏委而去者列城相望公以一介書
生當千億狂寇繕完城隍屏翰畿輔當其投袂赴節慷慨登
陴顏平原之流亞也及夫輸攻墨距撥麴掃籜則又田單卽

墨之守也中興伊呂崛起師干公之方略可相伯仲豈僅僅
百里之寄哉先是公以疊獲巨憝保升知府 賞換花翎至
是錄防河暨守城功奉 旨俟補知府後以道員用迺命
甫下而公遽以積勞不起時同治戊辰十一月二十三日也
距公之生嘉慶癸酉年僅五十有六官舍受含所施未竟悲
夫公尤善折獄故城有縊案死者嫠也公驗十指有血痕踪
跡得主名袒其胸爪傷宛然讞遂定其他發奸擿伏皆類此
然公雅不欲以得情自喜堂皇淑問哀矜溢於詞色故所至
獄訟衰息性廉介去永年日至斥其寢邱之產以治裝與弟
曾田式好無閒病則各以身禱兩人者初不自言旣歿諸孫
發篋衍得青詞手稿始泣然流涕曰吾先人有美而勿彰者

多矣公在家孝友在官忠勤汲引士流軫卹民隱易簀之日
知與不知同聲歎息配張恭人側室鍾宜人皆先公卒同治
庚午合祔於邑城東逢家村之西南公以錫蕃貴由中憲大
夫晉贈中議大夫贈張恭人爲淑人鍾宜人亦 贈
淑人子三長錫綸長蘆補用鹽大使次錫嘏候選知縣皆鍾
宜人出錫嘏出後曾田次卽錫蕃張恭人出光緒丙子 恩
科進士翰林院編修今官左春坊左庶子福建學政女二人
趙汝驥趙熊飛其壻也孫常昱常達銘曰

名城屹然畿臺門戶赤丸夜嘯羽書蠡牛狂瀾欲東隻手拄
之貔貅磨牙伏而鹽之爲國扞城爲民砥柱師貞丈人里謳
慈父丹旄翩如蒼停相杵勞臣遺愛其風已古黃腫海濱逢

村之鵑詹卜墨食厥惟吉土宰木鬱森崇封堂斧神爽來依
國族是聚繼起振振克繩祖武我銘不刊幽宮可補

六合縣學訓導劉公靜巖墓誌銘

公諱某字靜巖先世自吾郡遷寶應曾祖岐齡祖友尙父廷
器國學生以公長子嶽雲官 貤贈中憲大夫妣雷繼妣胡
皆 贈恭人公胡恭人出篤於天性六歲喪父聞孺子啼者
皆爲流涕道光丙午胡恭人病且革公刲臂肉以進至誠感
神母病愈竭誠色養又二十三年而始歿歿之後歲時諱日
思其居處思其笑語未嘗不泣下也胡恭人之守節年踰三
十矣公曰吾母有陶嬰梁寡之高行而不得邀 旌閭之典
何以爲人子援案申請卒 旌賢婦如例劉氏世有潛德自

端臨先生父子以經學教授子弟彬彬向學公纂述言行爲
劉氏先德錄二卷平居濡染家學生長食息不離訓典之內
顧屢不得志於有司以廩貢生就職訓導嘗一官邳州學正
再署六合訓導其初至六合也胡恭人已前歿公捧檄哀號
悲不自勝自以祿不逮養與人子言孝與弟言悌六合某生
不養其親公召而詰之已而曰汝有母不事吾欲事又無母
言已噉然長慟某大感動叩頭趨出歸爲母子如初邑民苦
重征圍令廨令匿公所而以飛章上變謂民且叛公旣以利
害說其民使解散又力爲令言民非叛狀比大吏檄兵來統
領爲吳壯武公長慶吳公雖武人雅重文士惟公言是聽以
故獄得不竟終其事不戮一人云故諸生某以尋親未與歲

試已褫籍矣公曰是無以教孝也長逝者之賁恨庸有窮乎
爲牘請於學使者還其矜居鄉矜孤恤寡存亡繼絕胡恭人
家不祀忽諸又無可承祧者公訪得疏族某奉其七鬯族子
某貧不能娶公爲授室宗黨貧者往往待公舉火寶應地當
孔道驛馬交午主者沒其餽牧馬於運河西草藪中蹊人之
田公白諸當事勒碑嚴禁自是馬不得過河西牧蓋公矜立
名節猛志疾邪然清而不刻當官接物多所矜恕其天性然
也公雖三爲校官經國之志未由自見嶽雲官農曹時時貽
書敦勉之農部君與亡友王頌蔚繆祐孫同鄉同官負三君
八俊之望皆公教也公舊有嗽上氣疾光緒甲午疾作捐館
距生於道光某年某月某日享年若干歲子四人長卽嶽雲

光緒丙戌進士戶部主事次熙雲際雲季毓雲縣學生昌熾
東髮受魯論稍長習春秋公羊傳卽服膺寶應劉氏之學洎
官京師與農部君以古學相切劘益孰聞公之行誼農部君
貽書京師曰先人葬有日矣願爲銘土之文昌熾聞諸孔文
舉曰公者仁德之正號不必三事大夫敢援申公毛公之例
書其墓石曰劉公復繫之銘曰
畔官祭酒母高行孝于惟孝施有政泮林之桑鵲食甚翻然
不煩鱣撻儼江左傳業比孔鄭家世迺以經術盛巍然一老
天不憖人之云亡邦亦病蠶湖湯湯水如鏡若堂若坊松檟
映蓋棺庶幾可論定漢校官碑共無竟

候選同知沈君寬夫墓誌銘

甫里古多隱君子天隨先生尙已有明之季若邢星父許樗
庵並以躬耕高蹈有聞於時然自潔其身而已若夫旄期樂
道敦善行而不怠崇尙風義甄綜掌故如沈君者豈僅一鄉
之善士已哉君諱國琛字寬夫先世有爲贅壻於浙之竹墩
者昌其宗世稱竹墩沈氏越十傳至兆岐始遷於吳兆岐第
三子鍾冕卜居長洲之甫里 國朝雍正二年析長洲爲元
和縣其後裔遂占元和籍君之曾祖諱天璧鍾冕五世孫也
生錦成錦成生萬鵬是爲君之祖父兩世並以君官封奉政
大夫君之考又以孫官 晉封資政大夫妣趙夫人生二子
君其長也天性孝友任俠重然諾有古朱家季布之風八歲
而贈公歿趙太君授之讀君不屑屑於章句之學逢罹世紛

通知時變赭寇之難奉母避地邨落閒挺身出治兵勸耨棘
矜號召鄉里以其閒定省無缺故寇警在郊而太夫人晏然
若不知有兵者比母歿君年已三十餘矣雞斯柴立悲動行
路終天之恫又三十年家人於夢寐中未嘗不聞孺子啼也
君旣輟儒業以計然術起其家然蓄而能散慨然負經世之
略末由致用則試之於一鄉金雞湖者值郡城之東南與唐
浦澱湖相灌輸懸流傾瀉潏潏無際空輿輕騎滯尋弗前老
稚負擔臨危槍礪君愍然憂之會己丑郡中大水君建以工
代振之策築兩隄通往來又以郡城自經兵燹廬井邱墟有
如乘者有如堵者有如覆敦者脩之平之攘之剔之以實隄
則固於淇園之槌而曠地亦不至終淪爲甌脫當事踵其議

凡畚鍤之役壹以畀君君日棹扁舟水次星餐露宿邪許之聲與波濤相鞳鞳隄成行旅頌之里中舊有同仁堂舉行掩骼埋胔諸政君曰是嚆矢而已宜有以擴充之於是瘞而貧者穉而蒙者游惰而不率者有教有養目張綱舉立忠義祠以妥國殤脩節孝祠以推錫類本朱子家禮以建祠則繼別爲宗之誼也仿范氏義田以贍族則異宮同財之政也尤好引掖後進景行先賢所居鄰保聖寺卽天隨故宅相傳有桂子軒鬪鴨池年運而往盪爲寒煙君憑弔興懷按圖經而締構卽於其中結詩社茶租釣褐晚弋寒春松陵壇坫於茲復振甫里書院絃誦闐如者久矣君捐田四百畝爲諸生膏火博訪通人兼課經史天算諸學里中子弟幡然興起一變其

空花臭腐之習里乘自許堯心先生後未有踵而脩者君探
撫故實發凡起例以屬許息嵎楊薪圃兩明經未卒業而兩
君先後歿又議立甫里名賢祠以申祭社之義亦未觀厥成
而君遽不起易簣之辰引爲深痛蓋君之惓惓於桑梓如此
昌熾雖未識君同年尤鼎孚內翰君之姻家也貞豐陶子春
先生君之老友也皆嘗爲昌熾言君善行甚備昌熾弱冠之
年從事郡志卽喜爲徵文攷獻之學長游四方泊宦京師益
事搜討名山之藏有志未逮如君者庶幾可引爲他山之助
而亦長往矣君以光緒壬辰九月一日卒距生於道光庚寅
六月二十三日享年六十有三子三根源優廩貢生甘泉縣
訓導先君一年卒濬源附貢生援例爲部主事加八級福源

附生君卒後六年丁酉舉於鄉女一適秀水拔貢生王大鈞
孫三長慰根源出長蔭長吉濬源出君初以籌餉功議敘府
同知 賞戴花翎 誥授奉政大夫復以濬源官 覃恩晉
封資政大夫歲在戊戌福源試禮部持狀來請曰先大夫之
卒也以客歲丁酉之冬卜葬於崑山縣呂區十五圖閑字圩
荷花漣之新阡未有銘願爲文以補納之幽竈昌熾旣銓次
其事實復繫以銘曰

光明之閣白蓮院碧漪藻苻石梁畔江湖散人自爲傳鴻飛
冥冥弋何篡津梁欲濟苦無岸溺者淪胥待手援以工謀食
非畫墁廣厦千閒矢宏願隱居何必非兼善鄉人好之不云
愿獻章雪鈔并露纂禮重先河祭則裸我愧銘祠非黃絹聊

視建初買地券

五品銜翰林院庶吉士殷君小譜暨德配卓恭人墓誌

銘

吳江平望殷氏自歛遷吳世爲右族其先曜庭先生績學工詩潛德未章至其子兆鏞始以文學起其家仕至禮部左侍郎侍郎公娶於程以道光戊戌生君日者推其命曰位至兼圻壽躋大耄迺年未強仕甫通朝籍遽先侍郎而歿悲已時光緒紀元乙亥臘月二十二日也越二十有三年歲在戊戌七月朔日君配卓恭人復以病歿於京邸享年五十有九昌熾以洽比之誼束薪往弔令子柯庭比部柏齡菊延駕邵杞齡扶服帷次哭且請曰先大夫之葬也未有銘今將奉母匱

南歸願爲隧石之文啟先大夫之兆域而合窆焉昌熾詞館
後進且辱與柯庭昆仲交誼不當辭先是君之歿也侍郎公
爲文以哭之甚哀謹讀而詮次之曰君諱葆源後省葆字更
名曰源宿海其字侍郎公復以式穀之義命之曰小譜生有
異稟岐嶷善讀兼綜九流旁精八法九歲作擘窠大書驚其
長老有客以畫扇索題君援筆書曰芳草萋萋鳥雀歡喜明
月一上照見萬里客大稱歎謂非常童也稍長侍侍郎公於
澄懷園直廬奉勅寫進之件恭代稱旨雖文宗顯
皇帝亦知侍郎之有子也旣居京師久熟聞中朝掌故先達
緒言益自陳篋發憤羣經諸史及文選困學紀聞皆有劄記
蠅頭細字旁行斜上夜分不少休顧屢不得志於有司俛得